

山右石刻叢編

山右石刻叢編卷十四

賜進士出身直隸長治府知府郭德裕等題撰西來菩提尊像功德碑記刻於城內胡氏之第

宋

清虛觀牒

石高一尺八寸三分廣二尺二寸十三行行字不等行書今在平遙縣城

中書門下牒

汾州

汾州奏准

赦勘會到係帳存留寺院等乞賜名額候

勅旨取到祠部狀並係得支帳內平遙縣太平觀宜賜清

虛觀

牒奉

勅如前宜令汾州觀察錄勅黃降付逐

寺觀院舍依今來勅命所定名額牒至准

勅故牒

山不才考異卷之十四

治平元年三月日牒

戶部侍郎叅知政事趙

戶部侍郎叅知政事歐陽

中書侍郎兼禮部尚書平章事曾

門下侍郎兼兵部尚書平章事韓

按碑刻汾州奏准赦勘會到係帳存留寺院等乞賜名額
取到祠部狀平遙縣太平觀宜賜清虛觀云云按賜名清
虛觀事見宋謝悰清虛觀碑其云准赦者通鑑長編嘉祐
七年九月辛亥大饗明堂大赦天下係帳存留寺觀未有
名額者特賜名額諫官司馬光言國家明著法令有創造
寺觀百間以上者聽人陳告科違制之舉仍卽時毀撤宋

時之制如是此牒言係帳存留寺觀乞賜名額者卽准嘉
祐七年九月辛亥赦與赦文係帳存留云云合牒後有治
平元年三月日戶部侍郎參知政事趙戶部侍郎參知政
事歐陽中書侍郎兼禮部尚書平章事會門下侍郎兼兵
部尚書平章事韓通鑑長編嘉祐八年正月甲申宰相韓
琦加門下侍郎兼兵部尚書曾公亮加中書侍郎兼禮部
尚書參知政事歐陽修趙槩加戶部侍郎並與碑所列官
合牒自官在次者起故先列參政銜後列平章銜趙次於
歐陽者宋史宰輔表嘉祐六年閏八月庚子歐陽修自樞
密副使除參知政事嘉祐七年三月乙卯趙槩自樞密副
使除參知政事歐陽入中書先趙故銜在前碑見通志金

石記

大雲寺牒

碑高一尺三寸廣二尺六寸十六行行字不等行書今在武鄉縣西六十里故城鎮

中書門下牒威勝軍

威勝軍奏准赦勅會到武鄉縣嚴淨寺係帳存留乞賜名

額牒

勅旨取到祠部狀係得文帳

牒奉

勅宜賜大雲寺仍令

本軍齣錄勅黃降付本寺依今來

勅命所定名額牒到准

勅故牒

治平元年四月六日

戶部侍郎叅知政事趙

戶部侍郎叅知政事歐陽

中書侍郎兼禮部尚書平章事曾

門下侍郎兼兵部尚書平章事韓

住持沙門崇敏立石

按武鄉縣志大雲寺在縣西故城鎮有宋治平元年石刻
書勅賜寺額牒卽此碑牒文云威勝軍奏准赦勘會到武
鄉縣巖淨寺係帳存留乞賜名額云云宋史地理志威勝
軍領縣有武鄉其云准赦及趙歐陽曾韓均見上碑碑見
通志金石記

梁軟祠堂記

碑高三尺五寸廣一尺九寸三分十九
行行三十二字正書今在絳州鼓堆村

絳州正平縣新修梁令祠堂記

朝奉郎守尚書水部郎中新差知淄州軍州兼管內河堤
勸農事上輕車都尉賜緜魚袋借紫薛宗孺撰

鄉貢進士鄭輔書

絳居兩河間為剗郡領縣七正平本漢臨汾隋開皇十八年
改正平唐武德元年移於今治山麓四擁土狹人夥比常艱
食惟水田之稜克以取濟距州之北幾一舍有石堆如覆釜
人馬踐履聲若鞀鼓上立祠狀婦人以主之質於碑志事無
依據意者謂水為陰象理或當然其下出泉衆流奔沸古傳
神泓開皇十六年內軍將軍臨汾縣令梁軌以亢陽頻災遂
跡晉之故道審勢逗絕疏源分派乃開渠十二率灌田五百
頃貫刺史牙城蓄為池沼迤邐間落浹洽園圃歲無旱憂邑

民歌頌刻石以戴其賜其文與書不紀名氏故不甚彰著及
樊宗師守居園池記言水自正平軌以辭僻而人罕成誦是
終不能顯聞當世居人但惠激沃之利不詳興導之因

前太守王公恪敏政好古謂有功於民則祀之議建祠於
石堆之北隅 邑宰宋君基立力貳其事塑容盛服遺風

凜然俾民俗瞻奉歲時有報享之地庶知惠功及人之深垂
信於不朽隋到今四百餘年軌以官卑故其德業於史氏無
傳今錄民功之實神而祀之將勵後人行事之法是日無妄
與夫言利邀功朝行夕廢者能不愧恥里人薛宗孺懼祠之
寢久湮廢無考謹述初始以永其傳異日編郡圖籍上職方
氏當取驗於此記

治平元年閏五月七日

宣德郎守太子中舍知正平□□□□勾河渠事賜緋魚

袋宋基立立石

朝奉郎尚書虞部員外郎通判軍州兼管□□□□□□

騎都尉賜緋魚袋裝士林

承奉郎守尚書祠部員外郎充集賢校理知軍□□□□□

□□農事騎都尉借緋周□

校通志金石記宋梁令祠碑治平元年閏五月薛長孺撰
今碑題朝奉郎守尚書水部郎中新差知淄州軍州上輕
車都尉薛宗孺撰絳州志薛仲孺梁令祠記一碑而撰人
有三應從搨本爲正歐陽文忠集尚書駕部員外薛君墓
志君諱長孺石班殿直諱陸之子厯知絳州通判成都府
以疾致仕嘉祐六年七月丙午卒此碑撰於治平元年長

孺自不得製文內殿崇班薛君墓志長子曰大理寺丞通判陵州仲孺又書簡與薛少卿二十通卽仲孺自康定年其父塾卒後歐公書簡稱之曰五丈人仕蒞軍器庫以至知汝及告歸皆言之甚悉無知淄事則此碑亦非仲孺撰又內殿崇班薛君墓志次子曰大理寺丞通判代州宗孺是宗孺者薛塾之第二子歐集薛少卿書簡十原注嘉祐治平間內有淄州近不得書應是煩惱文卽指宗孺與此碑題治平元年閏五月新知淄州正合碑爲宗孺撰無疑校碑言正平本漢臨汾云云隋書地理志絳郡正平舊曰臨汾置正平郡開皇初郡廢十八年縣改名爲太平寰宇記諸書皆言隋開皇三年自玉璧移絳州於東雍州城卽今州理而此言唐武德元年移今治可補諸書之闕梁軌開渠見樊宗

師絳守居園池記水本于正平軌病井鹵生物瘠引古沃
 澣人便宋孫冲重刻絳守居園池記序略水本于正平軌
 正平帶郭縣也隋開皇十三年內軍將軍梁軌為臨汾令
 臨汾即正平十八年改正平軌字世蕃材令也患州民井
 鹵生物瘠疲因鑿山原自北三十里引古水鹵經云
 鼓堆水地缺
 絕經濠坎則續之以槽穿城墉入衙注池別分走街衙阡
 陌又灌溉畦町訖入於汾此言開皇十六年臨汾令梁軌
 疏源分派開渠十二灌田五百頃歲無旱憂雖與孫序互
 有詳略同異然其為表彰梁軌治渠之勳則一也碑末題
 知正平縣宋基立立石尚書虞部員外郎通判軍州裴士
 林祠部員外郎知軍州周宋基立即記所云宋君士林見
 絳州志官與碑同又碑云前太守王公恪敏政好古則亦

絳守之有績者今志闕宜据碑補鄉貢進士鄭輔州志不載亦宜補列州志梁公祠一在鼓堆宋嘉祐年建薛宗孺有記以此知藝文題辭仲孺梁令祠記者爲誤碑見通志金石記

眞如院碑

碑高三尺六寸廣一尺九寸四分二截上截勅牒十四行行字不等下截記文十八行行二十四字均正書今在潞城縣南垂鑲

中書門下燄潞州

潞州奏准赦勘會到係帳存留寺院乞賜名額候勅旨取到同部狀並係得文帳內潞城縣金粟山福仙院宜賜眞如院

悚奉

勅加前宜令本州緘錄

勅黃降付逐寺院依今來勅命所定名額

煉至准

勅故煉

治平元年閏五月日煉

戶部侍郎叅知政事趙

戶部侍郎叅知政事歐陽

中書侍郎兼禮部尚書平章事曾

門下侍郎兼兵部尚書平章事韓

潞州潞城縣金粟山南垂村真如院重修佛殿功德記

惟大雄氏之徒能教持因果讀誦演說使四眾得法以悟法
鄙悖邪妄而一入於真淨妙明遷善遠罪致刑省訟息其于

政教也豈小補哉茲院始建舊名福仙迺唐咸亨三年逮今有宋治平元年改賜名額實三百九十餘載住持僧繼深與邑人維那李濱翰李敏楊瓊李應李顯等五十餘人重修佛殿績渾金釋迦佛一尊期建三門行廊鑄黑金鍾一顆僧之萃法之熾民居之衆貧富率歸依者十八九焉中間困或豐於儲貲或足於租則覓捨其粟之餘利其帛之湏立聖像以金其軀構華屋以崇其居飾其殿以尊焚禮敞其堂以求供利繁其徒延其裔也雄其法大其勢也為一方之壯觀萬目之瞻仰土木之備金碧之飾倍于前矣木剏森森臺殿崇崇來者如歸而不忍去翻口儒官蕭洒嗟呼仲尼聖師也塊處于弊簾之下雖繪七十子至賢三千徒至衆過門者尚不一顧矧肯捨金錢崇飾廟貌乎是吾口師不逮瞿曇之智遠矣

能師一日惠然見訪以厥工告成因伺余文故錄其事於碑之末

時大宋元祐三年夏五月望日栢谷山人劉光記

住持僧講圓覺經沙門繼深安定皇甫書

李昭素刊

按碑前刻宋治平元年閏五月牒後刻元祐三年劉光重修佛殿功德記潞城縣志牒內列銜爲韓琦曾公亮歐陽修趙抃時英宗卽位之初諸老並聚一廷爲有宋盛時以宋史諸書考之是年爲參政者趙鼎非趙抃歐陽卽歐陽修韓卽韓琦曾卽曾公亮題銜皆與清虛觀大雲寺兩牒合至治平元年閏五月戊辰琦等又各進官

琦遷右僕射
公亮遷戶部

尚書修遷
吏部侍郎

此牒仍書嘉祐元年加官可以證頒此牒在是

月戊辰前碑末題大宋元祐三年五月望日柏谷山人劉光記按宋碑本有吳中復諸人游柏谷山寺詩路安府志長治縣有柏谷山又宋嘉祐七年大享明堂赦天下係帳存留寺觀未有名額者特賜名額今山西寺觀刻宋敕牒者仁英二朝爲多由此赦也碑見通志金石記

鹿苑寺記

碑連額高四尺七寸廣一尺九寸二載上載十六行行字不等下載十六行行二十一字額題勅賜鹿苑寺記六字均正書今在洪洞縣

中書門下 牒晉州

晉州奏保明到下項寺係帳乞敕 明堂赦賜名額候

勅旨 洪洞縣 寶勝寺 宜賜鹿苑寺

牒奉 勅如前仍令晉州歸錄

勅黃降付本寺依今來 勅命所定名額牒至准

勅故牒

治平二年十二月二十一日牒

吏部侍郎叅知政事趙

吏部侍郎叅知政事歐陽

中書侍郎兼戶部尚書平章事曾

右僕射兼門下侍郎平章事

使 帖洪洞縣鹿苑寺准 勅黃一道 司范押衛

押孔目官衛押李宋押

右具如前事須頭口讞錄到

勅黃一道帖洪洞縣鹿苑寺仰收管一依今來

勅命所定名額照會者

治平三年正月七日帖

權知觀察推官陳押

節度推官馮押

尚書駕部員外郎簽書節度判官廳公事王押

尚書都官員外郎通判軍州事洪押

光祿卿直秘閣知軍州事李押

詳夫釋氏以空寂為本立像明機物物之陳皆寓微意故學者得以因有達空緣動反寂器類之設厥不可誤生機餐飡朝朝於心目之間動境繁蕪恍惚在色塵之內永因跪領親教和尚曰吾聞先師紹繼之語茲地乃古佛堂也嘉祥屢現聖燈而耿耿時來瑞氣紛芳螺鈸而闕闕覆去境內耆德近相謂曰豈不是諸佛道場也浼瀆捕官共激嘉心之勇銳

遂有賈司徒莊賈用和等請到代郡清涼山菩薩院僧法諱
圓登管辨灑掃建主住持度資十人語其徒曰茲地然者匪
撫字乎幸於天禧年間奉勅存留寶勝為号復告徒曰斯猶
未水厥內有資亦諱惠能諾其慈旨此師道業之餘習僧繇
之心髓丹青之暇寫顏氏之精神六藝三端鈴鍵於九霄之
外千般万化激動於傅相之心遂構其額号鹿苑寺迄今鄉
間靡不蒙蓋方域神祇万靈真宰普皆霑散者

皆大金天會五年五月日本寺講經沙門永因述

按洪洞縣志鹿苑寺在縣東鼻里即福嚴寺宋治平二年
建按碑前刻宋中書門下牒旨晉州奏保明到下項寺係
帳明堂赦賜名額候勅旨洪洞縣寶勝寺宜賜鹿苑寺云

云以此考之則鹿苑原名寶勝非福嚴嘉祐七年九月辛亥大饗明堂奉真

宗配大赦係帳寺觀賜額事見通鑑長編牒尾吏部侍郎
參知政事趙吏部侍郎參知政事歐陽中書侍郎兼戶部

尚書平章事曾右僕射兼門下侍郎平章事通鑑長編治

平元年閏五月戊辰宰臣韓琦遷右僕射曾公亮遷戶部

尚書參知政事歐陽修趙槩爲吏部侍郎牒下是年十二

月在閏五月後故琦公亮等官皆與長編合又嘉祐八年

夏四月甲申宰相韓琦加門下侍郎曾公亮加中書侍郎

在治平前亦合門下侍郎下闕字卽韓碑未刻治平三年

正月七日帖有權知觀察推官陳節度推官馮尚書駕部

員外郎簽書節度判官廳公事王都官員外郎通判軍州事

洪光祿卿直秘閣知軍州事李自陳以下宋晉州建雄軍

節度節度州例兼本故得有節察推判官碑後刻金沙門

永因鹿苑寺述云代郡清涼山菩薩院者卽五臺山釋典
謂之文殊洞見通鑑注按知軍州李史不著名宋史李及
之傳字公達迪弟之子由蔭登第通判安肅軍徙通判河
南府亡卒張海嘯聚及之諭使歸命獲之知信州入判刑
部韓琦以館職薦之召試除直秘閣歷開封判官知涇晉
陝三州以時考之及之得直閣在嘉祐末則此帖知晉州
卽及之也碑見通志金石記

柏谷山詩碣

石高一尺五寸廣二尺十九行行十
二字正書今在長治縣東北十里

遊柏谷山寺唱和詩

閏春三月二日陪

行之秘監遊栢谷寺

都轉運使左諫議大夫充天章閣待制吳中復

寶界欽岑路入雲間餘三月屬芳辰烟林未動陰森地山杏
寒開窸窣春潞子嶺頭銷白日神農祠畔駟朱輪乘閑自是
逍遙事誰羨襄陽倒載人

次韻

秘書監知軍府事陳述古

揚旌麥野從如雲訪古烟巖惜此辰 使節乍臨塵外境

時光增麗嶺頭春已忻得聞重三月更擬揮戈駐二輪

才德揆天多樂事

風流丕變潞川人

治平丁未望日立石

陳知遜書 任道寧刊

按碑題閏春三月二日陪行之秘監游柏谷寺都轉運使

左諫議大夫充天章閣待制吳中復次韻秘書監知軍府

事陳述古治平丁未三月陳知遜書以宋史吳中復傳考

之字仲庶與國永興人歷遷御史知雜事戶部副使權天

章閣待制知潭州

刻本誤作潭
今據長編改

瀛州移河東都轉運使進

龍圖閣直學士知江甯府成德軍校長編注治平元年十

二月中復自潭知瀛蘇魏公集孫抃墓志薨後十九月葬

開封府新里鄉實治平三年七月其薦御史得今河東經

略唐公介高陽安撫吳公中復皆時傑也中復自瀛爲河

東轉運

瀛州例兼
高陽安撫

史無年月以蘇魏公集考之則治平三

年七月仍知瀛也此碑題治平丁未實治平四年此中復

是年爲河東轉運之證通鑑長編治平二年正月丙午降

陝西都轉運使光祿卿陳述古爲少府監知忻州此碑題
知軍府是治平四年已移潞州忻小郡潞大藩以宋制例
之述古蒙恩量移無疑述古見王臨川集外制三司鹽鐵
副使陳述古衛尉少卿制校在嘉祐末宋史神宗紀治平
四年三月有閏月卽此碑閏春三月碑見通志金石記

壽聖寺牒

碑高三尺四寸廣二尺四寸十九行行
二十六七字不等正書今在平定州

奉 軍帖仰付此收管寺額黃文謹照寫石貴之上

中書門下牒 平定軍奏准都進奏院牒准中書劄子

昨降

勅下諸路州府 軍監縣鎮等應今月以前諸處無名額寺
院宮觀已蓋及三十間以上見有功德佛像者委州縣檢勘

保明問奏特與序留係帳拘管仍並以壽聖為額軍司若委平定縣尉張備卿樂平縣尉張仲達躬親下縣界逐鄉村檢覈到無名額寺院共二十三所並係未降勅日前僧人住持修蓋到佛殿房廊屋宇各三十間已有功德佛像見有僧人住持詣實結罪保明文狀在案軍司官吏保明並是詣實候

勅旨內樂平縣石馬村寺一所僧善德俗姓李見今住持宜特賜壽聖寺為額牒奉勅如前宜令平定軍驍錄勅黃降付逐寺院依今來勅命所定名額至准勅故牒

熙寧元年三月二十六日牒

給事中叅知政事唐

右諫議大夫叅知政事趙

左僕射兼門下侍郎平章事

軍帖內錄錄勅黃頭連仰依給寺收管照會者

熙寧元年五月三日帖

太原王允濟書

簽書判官廳公事鮮于

知軍事蔣

專獲京師聽問名額永安院座主僧清福

安定胡君奭刻字

按碑錄中書門下牒平定軍奏准都進奏院牒准中書劄
子降敕下諸路州府軍監等應今月以前諸處無名額寺
院宮觀已蓋及三十間以上見有功德佛像者委州縣檢
勘保明聞奏特與存留係帳拘管仍並以壽聖爲額按宋

史英宗紀嘉祐八年八月癸巳以生日爲壽聖節此敕云
以壽聖爲額爲英宗追薦冥福也碑末有熙甯元年三月
二十六日牒給事中參知政事唐右諫議大夫參知政事
趙左僕射兼門下侍郎平章事宋史宰輔表治平四年正
月丁巳神宗卽位九月辛丑趙抃自龍圖閣學士右司郎
中知諫院參知政事遷右諫議大夫壬寅曾公亮自集賢
殿大學士同平章事加左僕射熙甯元年正月丙申唐介
自龍圖學士給事中權三司使除參知政事抃以熙甯三
年四月己卯罷公亮以三年九月庚子罷介以二年四月
丁未卒碑立熙甯元年五月正公亮爲相抃介爲執政時
碑有平定縣尉張備卿樂平縣尉張仲達簽書判官公事
鮮于知軍事蔣皆可補晉志乘所不及

御祭狄青文

石高一尺八寸廣三尺二十行
行十六字正書今在汾陽縣

御製武襄公祭文

皇帝特遣入內侍省內侍押班張若水

致奠于故贈中書令兼尚書令狄青之靈

維熙寧元年歲次戊申五月壬申朔二十四日乙未

皇帝特遣昭宣使忠州刺史入內侍省內侍押班張若水

致奠于故贈中書令兼尚書令狄青之靈惟

天生賢佑我

仁祖沉鷲有謀重厚且武昔居校聯功名自憲暨登籌唯益

奮忠義惟是南荒有益猖獗陵躐二廣震驚京闕群公瞻顧

莫肯先語惟卿請行萬里跬步首戮驕將大振吾旅金節一

摩敦敢齟齬遇賊于原親按旗鼓彼長牌槍我利刀斧馬馳
于旁擣厥背膂驅攘殲繫如手採取奏功來朝遂長右府旋
升外相均逸邦畿如何不淑早弃盛時逮子褰服弗覩音儀
因覽遺略及觀繪事緬懷風徽感歎無已遣使臨奠用旌前
勞靈而有知富體茲意尚饗

按金石續編云吳曾能改齋漫錄備載祭文並記青子諮
奏事延和殿神宗問青遺書詔上平蠻記及歸仁鋪戰陣
二圖神宗乃自爲文祭之方是時神宗春秋正富文已如
此卽本鄭懈序也今攷金石記引建炎以來朝野雜記謂
神宗祭狄武襄文乃中丞滕達道所作與吳曾所紀不同
續編又云漫錄祭文校縣作校聯自憲作自喜暨登作既
登驛將作騎將牌槍作排槍均近作均逸前勞作前勦以

音義攷之近之作逸漫錄字誤聯作縣勛作勞則書石誤也逮子下闕纂服二字從漫錄補今碑自憇憇字二廣二字不淑淑字因覽因字臨奠奠字均漫漶不可識據續編補正惟纂服二字不闕及聯字不誤耳均逸逸字續編謂漫錄之誤然攷宋時詔令大臣罷政出判州軍者有均逸偃藩之文狄武襄以嘉祐元年八月罷樞密使領護國節出典河陽正所謂均逸

均逸謂均勞逸

偃藩也續編改均逸爲均

近義不可通失攷甚矣平蠻三將題名第一將下有走馬承受公事入內侍省內西頭供奉官張若水名遣祭而使若水往者蓋以從武襄南征功闕可紀隆武襄亦旌若水耳若水以熙寧八年六月乙卯由宣政使嘉州防禦使入內副都知罷爲耀州觀察使依舊提舉四園苑事見長

編文獻通考入內內侍省有都都知有副都知有
押班有內東頭供奉官內西頭供奉官又云入內內侍省
與內侍省號爲前後省而入內省比前省尤爲親近若水
始終爲入內省官殆當日宦侍中之見用者也餘詳序後
碑見通志金石記

司馬諮墓表

碑連額高五尺七寸五分廣二尺二寸七分十四行行三
十一字正書額題宋故贈尚書比部郎中司馬府君墓表
十五字篆書今在
夏縣涑水南原

宋故贈尚書比部郎中司馬府君墓表

從祖弟翰林學士兼侍讀學士朝散大夫右諫議大夫知
制誥充史館修撰判尚書都省提舉萬壽觀公事柱國
河內郡開國侯食邑一千三百戶食實封二百戶賜紫金

魚袋光撰

兄諱諳字嘉謀陝州夏縣人其先宗支所自出見於 祖

墓碣 曾祖諱政祖諱珂父諱其皆不仕 兄為人謹

厚孝於親友於兄弟自幼及長無子弟之過不幸生二十八

年以天禧四年六月辛卯終於家 夫人同縣王氏進士

禹之女長男未名而天次男京生未踰歲而 兄沒

夫人年尚少自誓不嫁京既長以 叔祖天章府君蔭入

官為人強直幹敏所至吏民稱之由是累遷尚書駕部員外

郎通判潞州軍州事贈 兄官至比部郎中 夫人享

榮祿之養幾二十年封福昌縣太君年七十九以熙寧三年

七月壬寅終二女長適鄉人曹中立早卒次適進士宋輔始

兄之沒光生二年矣故於 兄之材行不能詳知然

苟非 兄力為善於其身而無祿安能有遺福及其後邪

兄以天聖六年三月乙巳葬于 先塋及 夫人

之沒以其年十月辛酉祔于 兄墓京懼歲時之久不可

以莫之識也泣請於光為之表

熙寧三年十月四日嗣子京立

朝散郎前行榮州錄事叅軍兼司法事鉅天錫書并篆額

亢文德刻

按司馬溫公集是表作於天聖元年三月今據表文諮以
天禧四年六月辛卯終於家夫人王氏終熙寧三年七月
壬寅又云兄以天聖六年三月乙巳葬於先塋及夫人之
沒以其年十月辛酉祔於兄墓京懼歲時之久不可以莫
之識也泣請於光為之表則此表自係祔葬後為之溫公

集謂作於天聖元年殊不可據又攷續通鑑長編治平四年閏三月時神宗已即位甲辰公以龍圖閣學士入爲翰林學士

熙甯三年九月癸丑以翰林學士兼侍讀學士右諫議大夫知制誥充史館修撰加端明殿學士出知永興軍今碑首所繫銜與長編所紀出知永興時官職適合京之求公撰文必在是時無可疑者碑末書熙甯三年十月四日嗣子京立據夏縣志京字亢宗溫公再從子餘所載與碑同表謂京爲人彊直敏幹所至吏民稱之惜史不爲立傳事蹟遂付闕如矣鈕天錫史亦無傳度當時必以善書名者其書天慶觀碑在至和三年官爲給事郎此碑結銜爲朝散郎前行榮州錄事參軍兼司法事攷宋史職官志朝散郎正七品視給事郎只進一階耳榮州地理志屬潼川府

路碑見通志金石記

靜軒記

碑連額高二尺九寸廣二尺三寸二十行行二十三
字正書額題靜軒之記四字篆書今在壺關縣署

熙寧三年十二月來尉於壺關始至之日見其窮山荒嶂蒼
煙白露環乎左右前後視其官居則又庳汚底滯几一目之
所及莫不使人歔歔而嘆息既而翻然自訟曰是豈不足以
居耶九夷天下之所共賤而棄之君子猶不以為陋况路距
京師幾數百里而斯邑也又在路之左是可處也居三月得
故材於聽事之東而屋之又自書而揭之曰靜軒列以圖繪
繚以簡編當其無事時一寓之於文字筆硯之間顧不可喜
哉而時之能文者皆以詩遺靜軒然吾之為是軒固非擬靜
之名而欲激於時也蓋以謂天下之事萬物之理其來也無

窮而其應也甚煩以我之所甚煩而對彼之所無窮猶鞭駛馬決積潦疾馳大潰而不知止噫亦惑矣大氏人性無不靜有時而動者物撓之也物撓之則不得其靜矣故吾之為靜者將以禦夫動也然天下之動吾不能以一已而勝之苟外物之足以纓吾心者吾有以虛而待之矣至於死生得失為累之大者又奚不能自必哉若夫巢乎深山之谷釣乎野水之濱或耘之田或築之巖此古之真靜者吾不得跂而至焉然於一軒之中蕭然自放野鳥容與而上下山雲卷舒而去來倚佳木而長吟引清風而獨嘯而吾之樂也如此與逍遙於自得之場而遊乎塵垢之表者亦浩然庶幾乎

五年七月一日陳留范鉞記

□□廣漢謝宗孟題額

上黨任道壺刻

核壺關縣志靜軒在縣治廳事東宋縣尉陳留范鉞建熙甯四年七月一日撰記今碑現存縣署二門壁間縣志宋縣尉范鉞陳留人紹聖元年五月一日五龍宮碑鉞結銜爲左承議郎通判權發遣潞州軍州事校元祐官制金紫光祿大夫以下進士出身者爲左餘人爲右鉞題左承議郎固進士也碑言熙甯三年十二月來尉於壺關此是月鉞爲壺關尉之證又云得故材於聽事東而屋之書而揭之曰靜軒與縣志鉞建合長編神宗哲宗朝有范鐘范錡鉞或其昆季行記文澹渾冲穆與河東集居士集諸記相仿末書五年七月一日陳留范鉞記志作四年七月一日誤則是時鉞猶尉壺關也碑末刻廣漢謝宗孟題額碑見通志金石

記

御祭狄青記

石高二尺五寸七分廣三尺二十七
行行二十八字正書今在汾陽縣

熙寧元年五月戊寅

上御延和殿西上閣門使狄諮以職事進

上曰若之

先父青有勞於國征南之事亦有遺書存乎宜盡度其所有
以聞諮即以平蠻記及歸仁鋪戰陣二圖以進

上覽之於是拊髀而歎息思雲臺之故將今不復見也乃
發乎昭回之光披而為文遣昭宣使內侍押班張若水齎上
尊太官之饌即所居祭之

上又曰圖中見乃父遺像

恨不及識之如聞當時亦有讒之者朕為之愴然諮頓首再
拜謝臣謹按公在仁宗時奮於戎馬間捍西羌連取奇功及

為樞密副使於時峒蠻儂智高出廣源州以驚南徼屢擇名臣以往訖無成績賊鋒亦漫繞邑廣數千里民舍無遺堵

天子側席而謀疇議將臣公即進言小醜猖獗請為陛下破之 天子歎其忠乃以大將軍鈇鉞出行天討既

就道下令諸將無得妄發兵裨將陳曉輒率所部出崑崙關與賊戰軍覆公以兵法誅之諸將皆震恐不敢後遂至邕敗賊于歸仁鋪賊窮犇海而遁進公以樞密使久之有飛語不復自辯遂請解機軸而去 天子加賜丞相印出真淮

陽明年遂堯公負謗言歿於地下矣方夷狄之暴橫公躬提袍鼓厲三軍於鋒鏑之間北嚮以報功世皆稱其忠勇及解甲而還邊境無所事或者起而攻之而世亦未能盡辨也及上親為製文以祭之又以一言明其讒則公之功烈

表表愈明白亘乎無窮而不可磨其平生鬱積之氣負於九
泉者亦已爆然破壞矣於此之時仗鉞之臣冠鶚之夫伏讀
而傳誦之莫不竦首頓足却立而四顧思為國家橫戈撥甲
爭先以鞭撻四夷足雖未馳而憤勇之氣已衝薄乎瘴海之
南而大漠之北矣諾且欲侈

大君之賜明先臣之烈
於是刻之金石表於墓次俾夫來者觀之不待鐘鼓玉帛之
賜而有以知勸矣熙寧二年正月六日翰林學士尚書兵部
員外郎知制誥臣鄭獬謹序六年十一月二十五日右諫議
大夫充集賢院學士史館修撰宗正寺修玉牒官臣宋敏求
謹書并題額

東上閣門使管句客省四方館公事句當 御前忠佐軍
頭引見司兼提舉集禧觀中太乙官公事臣狄詒立石

太原臣任貺摹鑄

按神宗遣使祭狄青事宋史本傳具載神宗考次近世將帥以青起行伍而名勳夷夏深沈有智略能以畏慎保全終始慨然思之命取青畫象入禁中御製祭文遣使齋中牢祠其家此碑云狄詒以平蠻記及歸仁鋪戰陣二圖進覽上思雲臺故將遣昭宣使內侍押班張若水齋上尊太官之饌卽所居祭之並兩述神宗諭詒進青平南遺書及恨不識青語較史及東都事略所書爲詳足資攷證又碑載神宗詢詒語謂係元年五月戊寅今本長編熙甯三年前事悉佚褒勳大事李編必書轉可取此補其闕矣東都事略青傳云元昊叛以青爲延州指揮使爲先鋒破金湯城略宥州又城橋子谷築長安保砦以功遷秦州刺史涇

原路總管碑所云仁宗時奮於戎馬連取奇功者謂此又據通鑑長編皇祐四年五月青以彰信節度使知延州除樞密副使時儂智高先於四月由廣源入寇據邕州僭號橫貴諸郡皆陷遂圍廣州朝命知桂州余靖廣南東西路安撫使孫沔討之師久無功宰相龐籍薦青青亦上表請行九月庚午改宣徽南院使荆湖南北路宣撫使提舉廣南東西路盜賊事五年正月青至崑崙關斬達令將陳曙戊午大敗賊於歸仁鋪智高遁入大理國三月青還朝拜樞密使與記所載事悉合所謂屢擇名臣以往者指靖沔言所謂以大將軍鈇鉞出討者宋時宣撫猶唐季之都統權重位尊故以大將軍目之陳曉卽曙避英宗諱改耳史及事略載青爲言者所攻出鎮淮陽而不實其人今攷長

編嘉祐元年八月青由樞密使護國節度使加同平章事
罷判陳州實爲知制誥劉敞所攻初敞謂青家數有光怪
請出之於外以保全之繼又極言今外說紛紜雖不足信
要當使無後憂甯負青無使負國家青由是罷記言加丞
相印出奠淮陽謂爲使相知陳至云有飛語及負謗言於
地下卽指爲敞所譖與神宗諭誥如聞當時亦有讒之者
皆一事也青卒於嘉祐二年三月適出鎮之明年記故云
爾學士年表鄭獬以治平四年九月由兵部員外郎知制
誥拜翰林學士長編熙甯三年十二月右諫議大夫宋敏
求爲史館修撰四年八月加集賢院學士二人所歷官與
碑尾繫銜畢符青子二誥詠附見青傳據長編皇祐五年
二月東頭供奉官閤門祇候狄誥爲柴院副使兼閤門通

事舍人熙甯十年九月以東上閤門使提舉教習軍馬元豐元年八月使遼二年十一月副王中正爲開封府界教大保長提舉官三年六月提舉河北西路義勇保甲四年九月由東上閤門使榮州刺史遷四方館使六年三月加嘉州團練使元祐元年三月以御史王巖叟劾詔狄諮與外任宮觀差遣此諮仕履之可攷者又長編熙甯四年三月癸巳有入內副都知張若水名八年六月若水罷副都知改耀州觀察使金石記引周輝清波雜志記諮入對事與此碑同李心傳朝野雜記神宗祭狄青文中丞滕達道所作汾陽縣志狄武襄墓神道碑左側有熙甯元年神宗御祭文碑凡兩層上列祭文下方記遣使祭墓事鄭澥宋敏求宋史俱有傳碑見寰宇訪碑錄通志金石記

黑水祠醮盆銘

石高一尺八寸廣三尺五寸五分三
十四行行十五字正書今在平定州

黑水神祠石醮盆銘

并序

將仕郎守太原府文學于詠撰

夫人生天地之間明神其助事歸其業謀生懇力勞苦衣食
養親活幼追朋會友銷饌宴樂借為得志之人其得志者倚
帀獲利耕稼豐登商賈倍美豈不盡天地蓋載之恩荷明神
威福之力人由歸感乃隨所處立祠廟塑靈容春祈秋報祀
災請福以為依投之所明乎昔有功及民書於祀典者今萬
吉村西山下溪之側古有黑水神祠塑像壁畫儼然若生供
具儀器悉備焉唯闕燒醮石爐之盆時因致祭餽餘錢幣
焚爇於地神也聰明龜嚮怠慢之禮今遇

軍城西草市婦神向善之人欽仁重義之士盡竭懇誠願以良工崇飾大石刻鑿龍獸水藻之紋祭各乏財不能如意賴茲巨富齊選男齊仲濟備財命遼陽石工張安其人盡機智之巧顯有奉神之心遠乎專利苦身巧取成家重寶之名公助力出金人連應孫應張天詔張遷李贈崔嵩王安仁恩賈張清

南草市康俊萬吉村胡慶

所造石盆不累月工畢卜之會敬立於神前永永大用銘曰衆人之心誠焉不苟刻鑿爐盆容碩餘料免幣焚地成禮頗厚彼器固存日月不朽

熙寧八年九月念一日立石

懷州防禦判官知平定縣事何

著作佐郎簽書判官廳公事



山石志卷之四
三
朝奉郎守太常少卿知平定軍事楊

校碑題將仕郎太原府文學于詠撰校宋太平興國四年
平北漢降太原府爲并州嘉祐四年十月癸酉復并州爲
太原府並見宋史碑立熙甯在嘉祐後故得以太原府入
銜碑言今萬吉村西山下溪之側古有黑水神祠今元延
祐碑本韓粹中靈源公廟碑周世宗宋仁宗顯德至和之
間始以候稱是此祠自五季已有之方輿紀要州西八里
有嘉山山下有黑水泉流經城東合於洮水平定州志黑
水廟在嘉山嘉山在城西下有龍井井側有黑水泉上有靈源公祠又黑水卽嘉水與碑所
言黑水祠合其云遼陽者卽宋遼州軍城者宋平定軍城
也碑以軍人造祠內燒醮石爐盆而立末題熙甯八年九
月念一日立石懷州防禦判官知平定縣事何著作佐郎

簽書判官廳公事闕朝奉郎守太常少卿知平定軍事楊

校宋史百官志舊官防團判官新官從事郎崇甫舊官著

作佐郎新官宣德郎舊官太常少卿新官朝議大夫並元豐四

年碑立熙甯在元豐前故猶題舊官

司馬浩墓表

碑高四尺八寸廣二尺二寸五分十
七行行三十九字正書今在夏縣

宋故贈衛尉卿司馬府君墓表

從子端明殿學士兼翰林侍讀學士朝散大夫右諫議

大夫集賢殿修撰提舉西京崇福宮上柱國賜紫金魚袋

光撰

將仕郎試秘書省校書郎知蔡州西平縣事新差監許州

在城清酒務范正民書

府君諱浩於 太尉公為從父□其鄉里先世見於

祖墓碣 曾祖諱林 祖諱政 父諱炳皆不仕

府君少治詩以學究舉凡八終不遇遂絕意不復自進於
有司專以治家為事為人魁岸慷慨尚氣義於宗族恩尤篤
司馬氏累世聚居食口衆而田園寡 府君竭力營衣食

以贍之均壹無私孀婦孤兒皆獲其所凡數十年始終無絲
豪怨言家貧 祖墓迫隘尊卑長幼前後積二十九喪久

未之葬 府君履行 祖墓之西相地為新墓稱家之

有無一旦悉舉而葬之弟子里早孤 府君識其雋異自

幼教督甚嚴其後卒以文學取進士第仕至太常少卿所至
著名迹前此鄉人導涑水以溉田利甚博歲久岸益深峭水
不能復上田日磽薄將不足以輸租 府君帥鄉人言縣

官始請築堞於下流水乃復行田間為民用至于今賴之天
聖八年四月癸巳終於家年六十三慶曆二年八月癸酉葬
西墓初娶張氏早終生女適解人南公佐公佐舉進士得同
學究出身再娶蘇氏先 府君十年終年五十八生男宣
又娶郭氏無子後 府君十六年終年八十宣用 太尉
公蔭補郊社齋郎累官為尚書駕部員外郎知梁山軍今致
仕居家駕部君寬厚有守練習法令善為政吏民不能欺既
升 朝累贈 府君官至衛尉卿 夫人蘇氏追
封長安縣太君駕部君謂古之君子必論譏其先人之美著
諸金石故命光直敘其實以表於 府君之墓道時熙寧
八年九月庚辰也

石匠亢遇泉刊字

核碑題從子端明殿學士提舉西京崇福宮上柱國賜紫
金魚袋光撰將仕郎試秘書省校書郎知蔡州西平縣事
新差監許州在城清酒務范正民書碑云府君諱浩太尉
公之從父闕按光父兄以子貴贈太尉故縣志云浩光從
父溫公集有贈衛尉少卿司馬府君墓表卽此碑而文多
不同集曰於司徒公爲從父碑作於太尉公集曰時熙甯
六年五月辛酉碑作熙甯八年九月庚辰集多由後人定
碑當溫公時書當從碑搨本爲正碑云府君以學究舉文
獻通考宋禮部貢舉設學究科八上不第亦老於場屋者
弟子里宋史有附傳浩弟沂之子舉進士龐籍爲鄆延經
略使通判鄆州所至有惠政終太常少卿碑云生男宣累
官尚書駕部員外郎知梁山軍今致仕核宣事蹟詳見溫

公集駕部員外郎司馬府君墓志碑云導涑水溉田事見
夏縣志司馬渠引涑水以灌民田傳爲溫公開濬以此碑
考之蓋舊引涑水溉田後中廢由浩請築埭水乃復行志
誤范正民見畢仲游西臺集魏國王夫人墓志故觀文殿
大學士高平范公之夫人王氏子男五人曰正民先夫人
卒卽其人高平范公者純仁也

栖巖寺經藏記額上題刻五段

陳圓等題名

五行行四字字徑一寸正書左行在正中

陳圓機甫曹格仲承左幾明復元豐戊午重陽日遊

元伯等題名

三五行行四五字不等字徑七分行書

甲申寒食元伯無外同遂莠敷游

伯達等題名

三五行行六字字徑五分正書左行在額右

伯達季應大任和仲大觀戊子六月廿八日遊

潘元伯等題名

二行行八字字徑五分正書在額左

政和辛卯二月□日潘元伯李□明再遊

呂丕成等題名

六行行三字字徑五分正書

呂丕成魏延亨安□□政和癸巳七月十七日

按題名五段自元豐至政和在周顯德棲巖寺經藏記額陰

法興寺新修佛殿碑

碑高六尺四寸廣二尺九寸十七行行四十一字字徑一寸正書今在長子縣

潞州長子縣慈林山法興寺新修佛殿記

潞郡上與天黨號天下之脊而慈林挾右壺口踞太行之肩陟其峻絕莽蒼杳靄之間可以南望三川北顧汾澮其崇山

峻嶺穹谷大瞰草木茂密雲霞萬狀軒豁奇窳氣象熊熊乃
一山之祕奧而天下之形勝也佛寺經始於後魏之神鼎易
新於唐之咸亨厥後或廢或葺浸以頽弛逮

皇朝建隆之初有僧曰疑誨締構復完余

大門太師令

君嘗為之碑銘天聖中釋濠信與麻衣從深入又闢其基敞
三門於其前給事中孫公冲刻其辭于石今繼主其事者曰
紹業以佛殿始作於晉開運二季距今一百三十餘載垣穿
城夷棲桷傾圯且不足以侔崇闔之宏顯稱四注之周浹於
是募檀施鳩力役發於誠心來自信嚮崇壇廣宇撤舊謀新
經之營之成於不日其為殿三楹周以廊齋碧珉以為柱伐
石以為扉高廣壯麗可以為佗屋冠冠然後備像設之莊嚴窮
繪境之精妙率其徒朝夕焚香噴噴教其書而誦習之使來

者聞聲而悟觀相而信革闢怒鄙悖之心而向於和順消欺
誕險害之慮而趣於夷易外則漸摩於

上之仁義教化而恐畏於礼法刑典俾之暗然日遷善遠罪
蓋有以厚元元之性輔晏晏之化繇是而言則興廢繫乎其
時而得失存乎其人矣榮師生而朴愿幼襲佛服其見聞薰
修未始不做依於其教游泳於其業顧世俗貪冒沒溺者宜
不一動其心且其誠慤得鄉閭歆慕以能就其所願則其精
進智識可以副予向所陳為不疑矣殿既成使以書來請記
予以 大父嘗所游息而 先子誕育之地也閱其書
不知涕泗之橫集自託不腐實素願焉故為之記元豐四年
正月五日龍圖閣直學士太中大夫權判尚書吏部兼判昭
文館太原郡侯王益柔記

嵐州團練推官畢仲荀

書并篆額

朝議大夫知潞州軍州事兼管內勸農使兼提舉澤晉絳州威勝軍屯駐駐泊就糧本城兵馬巡檢公事輕車都尉太原縣開國男食邑三百戶賜紫金魚袋王 令圖 立石 監造碑通引官王詮 李嚴李昭素任道拱等刻石此法興寺新修佛殿記王益柔撰益柔字勝之宋史有傳銜云龍圖閣直學士太中大夫權判尚書吏部兼判昭文館傳不載兼判昭文館餘悉合司馬光嘗語人曰自吾爲資治通鑑人多欲求觀讀未終一紙已欠伸思睡能閱之終篇者惟王勝之耳其好學類此慈林山一統志在長子縣東南三十里多林木

光祿庵題名

側厚六寸四行行十四字
正書左行今在永濟縣

樂安薛休肅之元豐辛酉季春十六日全家宿光祿庵十九日乃遷題名姪昌年男昌國昌道昌諤孫錚鈞鎬鈇侍行

按永濟縣志棲巖寺又有宋至道元年禁牒其傍刻薛休
題名有姪昌年男昌國昌道昌諤孫錚鈞鎬鈇侍行又題
樂安薛休元豐辛酉季春云云今搨本薛字亦漫漶据志
訂按辛酉元豐四年休見永濟縣志宋樞密直學士寰宇
訪碑錄祭奠華嶽廟記薛休撰正書元祐元年十一月此
休仕元豐元祐之證王象之輿地碑記目達州碑記節婦
碑注節婦趙氏皇祐年知州薛休表其節爲立碑於達州
之西北則休又嘗知達州存以備考

耆英會圖並詩石刻

其七石均高一尺一寸第一石廣二尺五寸三十一行行
十五字第二石廣一尺七寸二十八行行字不等第三石
廣四尺五寸繪景元等十六像第四石廣二尺八寸五十
二行第五石廣三尺八寸六十六行第六石廣一尺七寸
二十七行第七石廣二尺一寸三十一行
五行行均十七字正書今在夏縣

耆英會序

昔白樂天在洛與高年者八人遊時人慕之圖傳於世

宋興洛中諸公繼而為之者再矣皆圖形普明僧舍樂天之
故第也元豐中潞國文公留守西都韓國富公致政在里第
皆自逸於洛者潞公謂韓國公曰凡所為慕於樂天者以其
志趣高逸也奚必文與地之襲焉一日悉集士大夫老而賢
者於韓公之第置酒相樂賓主凡十有二人圖於妙覺僧舍
時人謂之洛陽耆英會孔子曰好賢如緇衣取其敝又改為
樂善無厭也二公寅亮

三朝為國元老入贊萬機出綬四方上則固

社稷尊

宗廟下則熙百工和萬民為

天子腹心股肱耳目天下所取安所取乎其勲業闕大顯融
豈樂天所能庶幾然猶慕効樂天所為汲汲如恐不及豈非
樂善無厭者與又洛中舊俗燕私相聚尚齒不尚官自樂天
之會已然足日復行之斯乃風化之本可頌也宣徽王公方
留守北都聞之以書請於潞公曰亦家洛位與年不居數客
之後願以官守不得執卮酒在坐席良以為恨願寓名其間
幸無我遺其為諸公嘉羨如此光未七十用狄監廬尹故事
亦預于會潞公命光序其事光不敢辭時元豐五年正月壬
辰端明殿學士兼翰林侍讀學士太中大夫提舉崇福宮司

馬光序 以上第一石

武寧軍節度使守司徒開府儀同三司致仕韓國公富弼彥
國年七十九

河東節度使守太尉開府儀同三司判河南府潞國公文彥
博寬夫年七十七

尚書司封郎中致仕席汝言君從年七十七
朝議大夫致仕王尚恭安之年七十六

太常少卿致仕趙丙南正年七十五

秘書監致仕上柱國劉几伯壽年七十五
衛州防禦使致仕馮行已肅之年七十五

大中大夫充天章閣待制提舉崇福宮楚建中正叔年七十

三

司農少卿致仕王慎言不疑年七十二

宣徽南院使檢校太尉判大名府王拱辰君貺年七十一

太中大夫提舉崇福宮張問昌言年七十

龍圖閣直學士通議大夫提舉崇福宮張燾景元年七十

端明殿學士兼翰林侍讀學士太中大夫提舉崇福宮司馬

光君實年六十四

會約

序齒不序官

為具務簡素

朝夕食各不過五味菜果脯醢之類共不過二十器

酒巡無算深淺自斟飲之必盡主人不勸客亦不辭

逐巡無下酒時作菜羹不禁

召客共用一簡客注可否於字下不別作簡
會日早赴不待速

右有違約者每事罰一巨觥

以上第二石

景元

南正

肅之

昌言

伯壽

安之

君從

寬夫

君覲

君實

彥國

正叔

不疑

温公十八世孫露立

以上第三石

書英會詩

富弼

伏承留府太尉相公就敝居為耆年之會承命賦詩謹錄
上呈伏惟采覽

西洛古帝都衣冠走集地豈謂名利場驟為耆德會大尹吾
舊相曠懷輕富貴日與退老遊臺閣并省寺予慙最衰老亦
許預其次遂欲肖儀容爛然形繪事閩嶠訪精筆蛟綺布絕

藝人復崇宴衍聊以示慈惠幽居近銅駝荒榮仍湫底塞路
移君庖盈車載春醴獻願互相趣歡處不知止商頤有四翁
晉林惟七子較我集諸賢盛衰何遠爾並事實可矜傳之為
千祀

弼竊覽長篇有十二人中第二人之句又賦一絕上呈

願我年齡雖第一在公勲德自無雙不惟行業終無敵富貴
康寧亦可降

文彥博

九老舊賢形繪事元豐今勝會昌春垂肩素髮皆時彥揮塵
清談盡席珍染翰不停詩思健飛鵬無筭酒行頻蘭亭雅集
誇脩禊洛社英游賞序賔自愧空疎陪几杖更容欵密奉簪
紳當筵尚齒尤多幸十二人中第二人

彦博伏觀公詩有第一無雙之句輒成二十八字上呈

洛下衣冠今最盛當筵尚齒禮容優惟公福壽俱勲惠今是
人間第一流

彦博代簡上君貺宣猷

勿愛大名名遂忘西洛樂銅駝本自佳金鳳亦不惡二月三
月春融融千花萬華紅灼灼公子早歸來莫負花前約同賞
狀元紅更對劉師閣

席汝言

繫國安危唐上宰功成身退漢留侯二公間暇開高宴九老
雍容奉勝流共接雅歡恩意洽不矜富貴禮容優賞心樂事
人間盛豈謂今稀古莫儔

壯歲塵埃祿仕牽老歸重到禱林泉曾無勛業書青史偶向

康寧養老年自分杜門居陋巷敢期序齒預公筵更慚形穢
才涼薄不稱圖真接鉅賢

王尚恭

端朝風望兩台星珪組參差又十人八百喬年餘總數一千
熙運遇良辰席間的語皆非俗圖上形容盡得真勝事主盟
開府盛誤容衰薄混清塵服許便衣更野逸坐從齒列侶天
倫二公咲語增和氣夜叉盤花旋發春

趙丙

新春鼎浴燕英髦主禮雍容下庶寮二相比肩官一品十人
華髮仕三朝星階並列瞻台耀樽酒時行挹斗杓東穎庸夫
最无狀也將頰面趁嘉招

以上第四石

劉几

司徒碩德今無比太尉殊勲固絕倫偶以暮年陪盛宴喜將
白髮照青甯八公祇有山空著四皓當衰志且伸元老相望
踈跡在不應此會愧前人

制舉省元推二相龍頭昔日屬宣猷人間盛事並遐筭一席
幾盈九百籌

馮行已

書稱五福壽為先有德人方得壽延自愧樛樛非遠器誰應
齒髮亦遐年立身官未三公貴推老名陪二相賢喜把衰容
模梵宇慙無纖効勒燕然當時遭遇承陶冶今日光榮預譔
筵從此洛城增勝槩又新重作畫圖傳

楚建中

自顧頽齡七十餘以慙頑鈍費洪爐歸逢大老耆年會衰朽

形骸愧畫圖

二相謨猷爛史編諸公才業過前賢好圖儀像傳來世何事
頑踈亦比肩

王謹言

相印貂冠燦六符華顛高位侍臣俱不將官職誇鄉里惟尚
年齡入畫圖履道清歡追故事之瞻陰德見訃謨叨陪几席
真榮觀珪璧叢中間瓊玖

王拱辰

西都山水天下奇神嵩景室環清伊甫申間氣秀不絕生賢
會聖昌明時衣冠占數盛文雅台符卿月光離離魏京雄奧
壓幽朔宸宮御府嚴天威膏田千里翳桑柘犀甲萬旅馴熊
羆公當緩帶名三鎮懸赤繼軫承保釐追惟契遇取深舊加

復雍孟交旌麾

仁皇一在龍虎勝桂堂先後攀高枝宦游出處五十載鸞臺
驥路俱騰夷三公極位固遼隔五年以長猶肩隨公今復主
鳳門鑰僕亦再撫銅臺圻二京相望阻河廣三徑不克陪遊
嬉忽聞幹步踵門至投我十二耆英詩整冠肅貌諷章句若
坐寶肆羅珠璣為言白傅有高躅九君結社真可師欲令千
載著風迹亟就僧舍圖神姿詞宗端殿序篇目滂灑大筆何
淋漓眷言履道靡克訕兎裘近邑將營歸報云繪素得精筆
願列霜壁如唐規退居舊相國元老十年還政洛之涯康寧
富貴備五福靈琦盛氣如虹霓昔年大對繼晁董登科賦第
同一替紫垣步武既通接金沙里閤還鄰比探禪論道劇訓
對摩軋太古窮天機二賢勛業冠朝省爵齒宦學誰依稀今

將圖畫表來世詎可下客聯縷綾既蒙月品定人物不敢循
避違風期况承開闔厚賓客富有景物佳園池銅駝坊西福
善宅修竹萬箇籠清漪天光臺亭未百尺下眺林嶺如屏帷
花王千品盡殊勝風光繡畫三春暉六相街中潞公第碧瓦
萬木煙參差左隅廟室本經禮右閣宸翰尊星奎婆娑青鳳
舞松枯煥爛素錦薰醱醑石渠飛溜漱寒玉晝夜竽瑟鳴階
墀伊予陋宇治窮僻姑喜地廣為環溪樓名多景可曠望莖
號風月延清輝四時花蔭不外假拏舟傲憤聊嬉怡懷歸撫
事若饑渴恨無羽翼西南飛人生交舊貴倫輩情親意接心
相知豈無晚秀負才蘊高談大筴拘禮儀洛中故事名義燕
二毛第一年相推濯冠登仕荷天寵尊君報國當百為既嗟
大耋盍知止納祿謝事皆所宜顧方北道倚煩劇未許解紱

披荷衣長篇不令負花約為指風什歌式微如羨甘露爽心
骨侶柄玉塵親顏眉蘭叢雖未長羅宅菊英似亦思陶籬子
山已著小園賦彥倫猶愧鍾山移聊據短引謝招隱肯使猿
鶴常驚啼以上第五石

張問

槐庭二老樂堯仁盛集高年洛水濱華袞具瞻雖禮絕白頭
序齒却情親清閒几席同禪院山笠巾裘侶隱淪尊酒椒香
纔過節池塘草色已催春白公酣唱吟哦內衛武康強笑語
頻豈獨丹青傳不朽潛欣風俗欲還淳芝田鶴戲調形健蓮
葉龜游納息勻商皓寂寥拘小畜漢疏局蹙止家人莫因氣
貌疑丹竈自有光陰寄大椿復得兼謨為重客恐遺元爽在
編民神仙可學今方信道術相忘久益真滿座交歡祝眉壽

群生五福託鴻鈞

張燾

洛城今昔衣冠盛
韓國園林景物全
功在三朝尊二相
數踰九老萃群賢
當時鄉社為高會
此日俱留許欸筵
多幸不才陪履舄
更慙七十是新年

司馬光

洛下衣冠取惜春
相從小飲任天真
隨家所有自可樂
為具更微誰笑貧
不待玆羞方下筯
只將佳景便娛賓
庾公此興知非淺
藜藿終難作主人

作真率會伯康與君從年七十八歲安之七十七歲正叔七十四歲不疑七十三歲叔達七十歲光六十五歲合五百一十歲口號成詩用安之前韻

七人五百有餘歲同醉花前今古稀走馬關雞非我事紅衣
絲髮且相輝

經春無事耽翩醉彼此往來能幾家切莫辭斟十分酒儘從
它咲滿頭花

以上第六石

耆英會圖司馬文正公居洛日與一時名碩相會遺蹟也諸
公各繪一卷傳之子孫且序文會約皆司馬公親筆迄今手
澤存焉公十八世孫子霑先生懼其久而或湮鑄石以期不
朽拙逸子過而覽之低徊不能去因語及公之所以不朽者
夫人惟誠無息惟真不滅堯舜之心至今在此真此誠也個
個人心有仲尼此真此誠也失誠則偽漓真則妄偽與妄不
克終日公之學曰誠其會友也曰真曰誠曰真千古萬古我
輩自反寸心苟得所為真且誠者儼與公等會晤一堂也子

霑君以寒素青衿曩立公像梓年譜今又勒會圖刻家範可稱賢裔矣倘由此仰公之像更欲傳公之神讀公之書更欲肖公之心則真誠二字正一點滴骨血也鼻祖耳孫後先合符不尤賢哉不尤賢哉爰述所言附勒于左

涑水後學拙逸裴鶴章拜手題

先文正公洛社耆英會序約屬

先公手筆畫工閩人鄭兵可奪天巧一時盛事千古奇珍
開國伯侍郎公奉圖扈蹕南遷遂家浙之山陰通傳世守距
今五百餘禩

先孝廉君奉先人遺命完璧歸故里每於讀書之暇焚香啓
甌曝之籤之什襲之間出以示

諸名公諸名公必曰時人弗珍得無有恙耶詩曰申錫無疆

諸人名氏官闕富弼文彥博馮行己楚建中張問張燕均
有傳見宋史王尚恭溫公集作王尚官趙丙作趙曷王慎
言作王謹言序有宣徽王公方留守北都以書請於路公

願寓名其間以通鑑長編考之元豐三年九月丙戌判大
名府文彥博判河南判應天王拱宸判大名元豐元年十

月拱宸自宣徽北院使遷南院使

宋人以府州爲差遣宣徽其加官也

六年

三月拱宸加安武節度使再任序撰於元豐五年拱宸銜
爲宣徽南院使判大名府在未加安武前與長編合富弼

結銜爲致仕韓國公宋史長編並同

自鄭國進韓

而宋人著述

多稱鄭公不曰韓公宋史彥博傳在洛與富弼司馬光等
十三人用白居易九老會故事置酒賦詩相樂序齒不序
官爲堂繪像其中謂之洛陽耆英會好事者慕之卽本此

序宋詩紀事劉几字伯壽洛陽人第進士神宗朝官秘書
監致仕上柱國通議大夫風月堂詩話劉伯壽洛陽九老
之一也築室嵩山玉華峯下號玉華庵主有妾名萱草芳
草皆秀麗善音律伯壽出入乘牛吹箴笛二草以斬笛和
之聲滿山谷出門不言所之牛行卽行牛止卽止其止也
必命壺觴盡醉而歸嵩前人以爲地仙云王尚恭詩下有
自注燭下盤花開公卽指目焉劉几詩下有自注十二老
共八百九十二歲碑見通志金石記

呂仙詩碣

石縱橫皆一尺五寸八分九行行八字篆書
末題二行行二十七字正書今在潞城縣

呂先生詩

秋景蕭條葉亂飛庭松景裏坐趨時雲迷鶴駕何方去僊洞

朝元先我期

肘傳丹篆千年術口誦黃庭兩卷經鶴觀古壇槐景裏悄無人迹戶長扃

嵐州推官畢仲荀景儒編排保甲于潞城東山白鶴觀因篆此詩命刻諸石以傳永久元豐五年八月一日登州防禦推官知縣事朱正口記

按碑末題嵐州推官畢仲荀景儒編排保甲於潞城東山白鶴觀因篆此詩命刻諸石以傳永久元豐五年八月一日登州防禦推官知縣事朱正闕記王夫用新修龍祥觀記

有潞城東白鶴觀文與此碑東山白鶴觀合潞城縣志白鶴觀唐垂拱二年建畢仲遊西臺集有畢仲莊而無仲荀當亦其族人王安石行新法保甲爲最所措意者宋史兵

志保甲熙甯初王安石變募兵而行保甲帝從其議三年始聯比其民以相保任四年始詔畿內保丁肄習武事五年詔主戶保丁上番於巡檢司元豐二年十一月始立府界集教大保長法三年大保長藝成乃立團教法此碑刻元豐五年正保甲盛行時長編中編排保甲亦累見又按兵志保甲府界法成乃推之三路各置文武官一人提舉河東則黃廉王崇拯澶城隸河東故編排保甲視他路爲急宋史地理志登州防禦使有防禦推官正以登州推官而知路城政和前制也寰宇訪碑錄長子法興寺新修佛殿記王益柔撰畢仲荀正書則仲荀固能書者仲荀又見金石錄

義宗和尚塔記

碑高三尺五寸七分廣一尺八寸三分
二十行行四十四字正書今在稷山縣

大宋絳州稷山縣十方善寺故大乘戒師義宗和尚塔記

師諱義宗姓賈氏太平縣人也生而相好幼不味葷年十五
投本州崇勝院出家禮主僧□□為師以乳興元年誕聖節
中選為沙弥越明年受具足戒純和秉姓介絜扶俗風負天
聰為學日益稟嵩陽之嚴訓了法華廣文製南山之遺風精
毗尼淵義厥後嗣續傳燈飛揚英實大膺來學無遠弗届布
衣一食以戒律自居嘗謂其徒曰夫人之生也其姓元寔蓋
七情動于內庶物汨于外儻非以戒律繩之是猶猿之輕僂
馬之隲戾而不加之以羈鑣耳塗炭重苦立可待焉吾佛於
是發慈悲願垂戒律制俾其來者遷善遠舉達本復性是知
十地之位嘗不賴此途而陞矣汝曹宜知之其黨動止有稍

不如其律者必類而沮之繇斯座下之崩畏愛長相半也心
不蹶榮手不執寶雖金張之權門猗頓之富戶未嘗斯頃折
腰取容而盤桓其下戲其高蹈也如此未幾適會 朝廷奉

仁廟遺旨天下僧寺舊餘省籍存留者特與 勅額今大

善寺預焉先是釋啓仙主之服師大名遂舍此寺為十方住
持師以福德應其寺仁心安其眾慈悲化其俗禮律齊其徒
故茲寺未期年而豐備頓殊於向日莫不賴師住持之洪福
也熙寧丙辰歲自夏徂秋亢陽為沍密雲雖布於西郊良農
失望於南畝師於是懇志結壇七日獲報生平祥應多類如
此懼誣譖者以為妖說故不具書元豐初春正月札五臺山
文殊真像率清白二眾僅千餘人大集緡帛金鉢銀幡七寶
袈裟渾銀錫杖其它供養之物靡弗具焉偕同好輩跪獻臺

所感攝身菩薩光水墨羅漢像聖燈天花金橋之類悉現其
前非夫夙值善本願力斯成其孰能致于此乎又造弥勒像
一區日誦菩薩戒一遍結一眾於普和

化僧一眾為上生會
於普和寺至今行焉

建崇塔於翼邑斯咸生內院之緣也師寔能之加以汲汲真
乘不違處雖毫髮之善分寸之陰未嘗有所廢也師之存
心師之尊道不其偉歟凡講法華梵網等經四分等律及臨
壇度人授以三歸五八十善菩薩等戒者不可勝紀既而能
事畢矣弘濟多矣脫屣於夢境棲神于淨方以元豐四年十
二月八日終於本州龍興寺閭西院俗壽七十有七僧夏六
十有五于時道俗悲慟若有所失奉西域法而燔之獲舍利
百餘粒以明年七月旋歸本寺葬於寺之北原塔以表之門
人圖海等錄其行狀見求鄙辭讓且弗獲聊紀本末云耳

元豐壬戌歲孟冬晦日太原王宥記

門人圓戒圓善圓慶元定圓果 監寺僧圓括 庫頭僧

圓宗 副修造僧圓滿 門人典座僧圓因 都修造主

僧紹俊 當講沙門鴻濟門人講唯識等論住持沙門圓

海立石

安定胡志鐸刊

按碑皆言義宗和尚奉釋事志出太原王宥手稷山志宋
時曼師姓邢氏幼治儒術天才博瞻舉進士不第遂落髮
受具徧歷名山鴻儒碩彥多與遊呼曰岸濱長老常衣鹿
皮又號鹿皮道者後遊姑射山終葬以荼毘舌根不化瑩
潤若玉詳見太原王宥記是志所言與此碑絕不類而亦
王宥作記然則王宥作釋子碑蓋亦多矣大善寺据志在

高渠村元勅建於碑亦不合碑顯謂仁廟遺旨特與勅額志竟抵牾若此高渠村在城東北十五里寺卽建其處記以元豐壬戌歲孟冬作下題太原王宥記壬戌元豐五年卽宋史改官制之歲

塔寺修法堂記

碑連額高四尺二寸廣一尺七寸八分二十四行行四十四字正書額題六字篆書今在芮城縣

大宋□州芮城縣塔寺創修法堂記

河東姚宗道撰并書

隴西李好問題額

夫物有興而有廢也然考其興廢之理則未嘗不係於天時天有興而有奪也然察其興奪之由則未嘗不假於人力故天所與而物之將興者必因其人而然後成天所奪而物之

將廢者亦因其人而然後敗是物之興廢不在於物而在於
天之所命天之與奪不顯於天而顯於人之所為則知人所
為而或成或敗者莫不繫於天之與奪天□命而或與或奪
者莫不職於物之興廢尔嘗謂姬周已上鄉術唯庠序之是
崇逮□□而來郡邑漸塔廟之頗置□致道之離合之有異
教之今古之有殊竊原其由殆亦天意不然則何以永平□
□□而啓之於前正觀之英主□復之于後哉且□□佛之
為教也本以慈悲設諸方便慈悲則合乎仁之惻隱□□□
□□□□圓□惟其合於仁也故所以能感人之心惟其同
於智也故所以能覺人之意能感人心者則雖弱□以□□
□□覺人意者則雖寡可以服於衆是以始於西方則使黠
獷之俗咸奉其法流於中夏則致億兆之□□□□□□□

漢迄今幾及千載不泯絕而得行於世者復由此歟方唐之
盛時興造招提綦布天下雖山巖□□水□□□跡常不
到者猶皆有焉洎後罹兵火之難遂多隳廢然其間或完而
復興或毀而終泯者亦因其徒之賢否也芮為陝之屬邑介
于中條大河之間其土田膏腴與虞連畛實周初芮伯之國
也漢唐皆都長安而芮處甸服之內衣冠文物良為繁熾至
於道官梵宇故亦為多或餘址尚存或碑銘猶在傳自耆舊
是以得而聞也出縣郭東北僅數百步有古寺遺基久泯於
畎畝間每當耕耘歛穫時常於其地見有光出如炬遠而望
之甚明逼而視之乃滅由是邑人多神其異忽一日有好奇
者共誌而鑿之乃得舍利一器因復於元所再造塔而葬之
及創堂室後召僧惟孝住持頃又請法師惠潤來講其戒行

經論衆皆欽信於是僧俗同聞于

□□留共主其

院事 縣大夫憫衆懇誠遂從所請善士姚拯與其邑衆因
聆憫師談經義所記云切利天帝釋本自側微因與其徒同
修善法堂遂獲此無量之報焉於是乃選募妙匠遠市良材
築土成基構木為厦不日楹排彫礎梁亘修虹堯宇穹隆粧
嚴華侈衆觀壯麗莫不歎嘉始於元豐辛酉而訖於壬戌總
其所費之錢數越一百餘萬真足以宣暢貝文開誘群俗者
也姚拯復與其衆將聚赤金以造鍾則寺之再興由此而基
矣子所謂物之興廢未嘗不係於天時而假於人力者實不
為誣尔法堂既成憫師來丐子文甚確固辭靡獲乃勉為之
記使鑿于石焉

元豐六年歲次癸亥夏四月一日建

權縣尉兼主簿楊曷之

通直郎知縣事徐直侯

住持傳戒沙門 惠潤 焦元吉刊

按通志金石記宋塔寺創修法堂碑元符二年姚宗道書
芮城縣志藝文有姚宗道塔寺創修法堂記按卽此碑碑
言出縣郭東北僅數百步有古寺遺基每當耕穫見有光
出有好奇者志而鑿之得舍利一器復造塔而葬之召僧
住持所言邑士姚拯見金許安世壽聖鐘樓銘序碑云築
法堂始元豐辛酉者元豐四年訖壬戌者元豐五年壽聖
鐘樓寺銘序言法堂成元豐二年與此記不合記作創寺
時當從此記爲核碑又云姚拯復與眾取赤金以造鐘卽
安世序所言之鐘成於元符二年者碑末所列官有主簿

楊曷之知縣徐直侯皆見縣志碑立元豐六年非元符二年通志誤又今碑題河東姚宗道撰並書

今通志僅言隴姚宗道書

西李好問題額

黑水祠香鑪記

石八面高八寸七分每面廣二寸至三寸五分不等二行三行亦不等正書今在平定州

維大宋國河東平定軍西草市坊市戶郭秀□□□□心特捨淨財選□□□□石棟良匠之巧□創造香爐壹座謹獻

上

黑水大王 伏惟

聖慈至靈至感降福垂祥俯賜 留納

元豐六年五月五日

簿尉楊

知縣王

宣德郎簽書判官廳公事楊

朝議大夫知軍事寇

皇帝萬歲

重臣千秋

維那母李氏男郭秀次男郭□新婦恨氏新婦孔氏孫賞
哥

按刻文有元豐六年五月五日簿尉楊知縣王宣德郎簽
書判官廳公事楊朝議大夫知軍事寇按宋史職官志新
官朝議大夫舊官太常少卿左右司郎中新官宣德郎舊
官著作佐郎大理寺丞本紀元豐三年八月乙亥正官名
以開府儀同三司易中書令侍中同平章事特進以下易

左右僕射自是以下至承務郎易秘書省校書郎正字將作監主簿有差五年五月辛巳行官制此刻在六年正行官制後故結銜如此

福嚴院晏知止題名

碑高二尺廣二尺八寸十五行行十字字徑八分正書今在鳳臺縣

朝議大夫知澤州臨川晏知止處善朝奉郎通判澤州汝陽魚康伯曾夫宜義郎新瀛州簽判溫陵許公輔仲脩晉城縣令淄川衡規元度前潁州司法叅軍河內李訢公變同游峽石山福嚴院登遠師擲筆臺望角山相三泉儵然有塵外志因南縱百餘步訪青蓮院求師遺跡於殿庭之碑下臨丹川快襟久之元豐八年歲次乙丑夏五月癸巳朔廿六日戊午衡規奉命謹書

此知澤州晏知止率屬同游題名角山一統志在鳳臺縣
東南四十里兩山對立如丫角一名角山有款月臺丹水
源出高平縣四十五里一名莞谷水一名源澤水一名源
源水一名源漳水俗名丹河發源丹朱嶺東南流入鳳臺
縣界

惠明寺舍利塔碑

碑高六尺三寸廣二尺九寸二十四行行六
十二字正書今在太原縣北二里淨明寺

太原故城惠明寺舍利塔碑銘

資政殿大學士正議大夫河東路經略安撫使兼馬步軍
都總管兼知太原軍府事及管內勸農使護軍東平郡開
國侯食邑一千一百戶呂惠卿撰并書

朝請郎權發遣河東路提點刑獄公事兼本路勸農提舉

河渠公事上護軍賜緋魚袋借菽范子諒篆額

太平興國四年春 太宗皇帝征劉繼元於河東夏五月癸未繼元降 詔壞故城遷其民於新□而惠明寺實創於隋仁壽之初而其塔則佛書以為阿育王□造舍利塔八萬四千之一也既壞而光見 詔為之復建成平二年三月壬戌大震電風寺塔災六年□ 朝廷遣內侍王守真等發諸州兵一千三百人修之景德三年七月塔成累甃九級其崇一百五十有八尺 詔以汾州僧啓璘主寺事賜金書隨求九軸歲□僧五人大中祥符二年 詔廣堂廬五十有四間以東封泰山所得芝草十有一本賜之自塔復建至今元豐八年凡八十有一年矣而惠卿使河東實兼領太原軍府事寺僧惠素以碑刻未立乞文以記之惠卿嘗觀自有書契以來

聖人之得先行乎中國者其聲教所暨不過文軌之所同而已則其在下而傳其道以服乎天下者從可知也至西方有佛□者出則非嘗得志而行乎中國又非傳其道以服乎天下者也而浮行之所通聞□之所接雖殊言異文莫不為之累譯以習其書雖易服變貌莫不為之設祠以禮其像非特□□□□至於山岳之祇靈深至於江海之龍怪凡有情狀者亦莫不□聞欽嚮此固多見博識之士所共知者也夫豈以爵位利勢□聲諷說能使之然哉被以典□則□□有止此以神化故其運無方也以是觀之則所謂阿育王役鬼神以佛舍利為八萬□千寶塔其在中國者二十而惠明居其一亦奚足異哉而惠明□□□於隋之仁壽而舍利之至中國則不知自何代更若干年也然自隋唐五代以至我

有宋凡四百餘年□□雖時變代易人□天災而舍利之神
異終不□□故既壞而復興已焚而復建則佛之在相者
尚或如此則其法身非相金剛不壞者宜如何也竊惟

我太祖皇帝以天授人與既來四方矣而劉氏獨□□□
是時舉天下之□□定一國宜無不克者而承鈞以漢祀為
辭則終其□為之不如□□乎繼元迷不知變 我太宗皇
帝親討不享城雖□拔猶且力相□□□師以開其降遂
脫一國之民死則 我一祖 一宗之至德深仁亦曠古之
所罕見者也則 我有宋國祚之長遠雖與佛日照臨於無
窮豈不宜哉惠卿□□平日嘗以佛書洗其心因得造華藏
之真遊觀金光之妙相則於其教像宜所稱讚以開未悟而
酬大恩而又□□永綏斯民則當使之□□我有□□

□□生之造不翅如天地父母則欣戴樂推雖歷千萬世而不
不教者固其職也故因惠素之請樂為之叙其本末而以詩
□之其辭曰

大道微妙含虛空 其大無旁小無中 西方有聖維大
雄 其性如是相亦充 聲教非特文軌同 幽顯環嚮
逮天龍 金身示滅本非終 舍利傳布流無窮 阿育
寶塔非世空 八萬四千□穹隆 世間之智有盲聾

誰知此相與理融 惠明隋室初建崇 舍利來至知何
從 歷唐五季時怨恫 逢辰泰定此亦通 問誰相繼
揚真風 維 我有宋 祖與 宗 太原形勢控胡戎

唐俗猶□□邑豐 承鈞哀祈全故封 捨置度外開

涵容 繼元拒守迷不恭 矜脫屠戮麾臨衝 瑞光

□滅災峯 既壞復立益以穹 佛日發汝多生蒙 君
天賜汝再造功 悲慈憫仁均鹿鴻 差汝勿□世載忠
元豐八年八月初一日建

太原□貺摸刻

按碑題河東經略使呂惠卿撰并書河東提點刑獄范子
諒篆額曝書亭集呂惠卿儉人也當時君子視若鬼域而
王安石獨任之不疑且曰惠卿之賢雖前世儒者未易比
也今觀惠明寺舍利塔碑雖能文善書之士無以過之世
徒知其頭會箕斂之才不知兩人當日以經術定交而取
合於文字也嗚呼此其所以爲姦也歟金石萃編按此碑
撰者呂惠卿宋史姦臣傳惠卿累以資政殿學士知延州
丁母憂元豐元年加大學士知太原府將使仍鎮鄜延坐

斥知單州明年復知太原此碑立於元豐八年是復知太

原時也按通鑑長編元豐六年十二月壬辰資政殿學士

新知定州呂惠卿知太原

以金石續編晉祠題名元豐七年正月太原大帥王公得請還

青社文考之惠卿代王居卿元豐六年十一月乙未定州呂公著知揚惠卿自單州代之元豐八年五

月戊午資政殿學士呂惠卿爲資政殿大學士元祐元年

二月庚寅惠卿自太原知揚今搨本惠卿題銜爲資政殿

大學士河東經略安撫使兼知太原碑立元豐八年八月

正在加資政殿大學士後皆與長編合太原縣志淨明寺

在縣北古城隋仁壽二年建曰惠明宋太宗時塔圯光現

詔復建卽碑所云旣壞而光見詔爲之復建也有呂惠卿

碑記卽此碑金石續編晉祠題名有元祐丙寅河東提點

刑獄朝奉大夫范子諒則子諒元祐元年仍任已自前行

員外郎進階後行郎中矣子諒又見長編太原關 貺摸刻
卽任貺也碑又見寰宇訪碑錄通志金石記